

DOMENIE XVI «VIE PAL AN»

Antifone di jentrade Sal 53,6.8

Ve, il Signôr al vignarà a judâmi,
il Signôr al ten sù la mê vite.
Cun dut il cûr ti ufrissarai il sacrifici,
il sacrifici di laut al to non che al è bon, Signôr.

Colete

Cjale di bon voli, Signôr, i tiei servidôrs
e multipliche sore di lôr i regâi de tô grazie
par che, ferbints te fede, te sperance e tal amôr,
a condurin tal meti in vore cun fedeltât i tiei comandaments.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Gjen 18,1-10

Paron, no sta passâ dret devant dal to famei cence fermâti.

Dal libri de Gjenesi

In chei dîs, il Signôr i compari a Abram tal rôl di Mamre, intant che al jere sentât fûr de tende su l'ore dal plui grant cjalt. Alçant i vôi, al viodè trê oms in pîts devant di lui. A pene che ju viodè, ur corè incuintri de jentrade de tende e si butà par tiere. Al disè: «Paron, ti prei, se tu mi âs agrât, no sta passâ dret devant dal to famei cence fermâti. Lassait che si us puarti un pocje di aghe: us lavarai i pîts e o podarês distirâsi sot dal arbul. O voi a cjoli un toc di pan par che o podês ristorâsi prime di lâ indevant; no isal par chel che o sês vignûts chi dal vuestri famei?». I rispuinderin: «Fâs ce che tu âs dit». Alore Abram al lè di corse te tende di Sare e i disè: «Cjol svelte trê miezuts di farine di flôr, impastile, messedile e fâs trê fuiacis». Po Abram al corè là che e jere la mandrie e al cjapà un vidiel tenarut e saurît; jal consegnà al famei che al spesseà a preparâlu. Al cjolè la caglade, il lat, il vidiel che al veve parecjât e al metè dut devant di lôr; lui al stave in pîts dongje di lôr, sot dal arbul, e lôr a mangjarin. I domandarin: «Dulà ise Sare, la tô femine?». Ur rispuindè: «E je dentri, te tende». Dissal il forest: «O tornarai chi di te l'an che al ven; ta chê volte Sare, la tô femine, e varà un frut». Peraule di Diu.

SALM RESPONSORIÂL dal Salm 14

R. I monts di cûr a vivaran te cjase dal Signôr.

Signôr, cui podaraial vivi te tô tende?
Chel che al cjamine te onestât,
che al pratiche la justizie e tal so cûr al dîs la veretât.
Chel che nol met fûr cjâcaris cu la sô lenghe. R.

No i fâs mâl al so prossim
e chel dongje di lui nol svilane.
Chel che al spresee l'om plen di tristerie
ma chei che a àn timôr dal Signôr ju onore. R.

Chel che nol dà i siei bêçs fasint usure
e cuintri dal inocent nol cjape regâi.
Chel che al fâs cussi,
nol cloparà par mai. R.

SECONDE LETURE Col 1,24-28

Il misteri platât ai secui, cumò al è stât palesât ai sants.

De letare di san Pauli apuestul ai Colossês

Fradis, o soi content tai patiments che o sopuarti par vualtris e o doi la jemple intal gno cuarp a ce che al mancje a lis tribulazions di Crist pal so cuarp, che e je la Glesie. Di cheste Glesie jo o soi diventât servidôr conforme al compit che Diu mi à dât sul vuestri cont, par meti in vore la peraule di Diu, il misteri che, platât ai secui de eternitât in ca e a lis gjenerazions di une volte, cumò al è stât palesât ai siei sants. A lôr Diu al à volût fâ cognossi la ricjece sflandorose di chest misteri framieç dai paians: Crist in vualtris, la sperance de glorie. Nô lu predicjìn lui racomandant a ogni om e inscuelant ogni om cun dute la sapience, par fâ diventâ ogni om perfet in Crist.
Peraule di Diu.

CJANT AL VANZELI cf. Zn 17,17.19

R. Aleluia, aleluia.

La tô peraule, Signôr, e je veretât:
fasinus sants tal to bonvolê.

R. Aleluia.

VANZELI Lc 10,38-42

Marte lu lozà in cjase sô. Marie e à sielzude la part plui bieie.

Dal vanzeli seont Luche

In chê volte, Jesù al jentrà tun païs, e une femine, che e veve non Marte, lu lozà in cjase sô. Sô sùr, che e veve non Marie, si sentà dongje dai pîts dal Signôr e e stave a scoltâ ce che al diseve. Marte invezit e jere dute cjapade des sôs grandis voris. Alore si fasè indenant e i disè: «Signôr, no viodistu che mê sùr mi à implantade di bessole a fâ lis voris? Disii mo che mi dedi une man». Ma Jesù i rispuindè: «Marte, Marte, tu bacilis e tu scombatis par masse robis. Invezit une sole e je chê che e covente. Marie e à sielzude la part plui bieie, che nissun no je puartarà vie».

Peraule dal Signôr.

Su lis ufiertis

Diu, che inte perfezion di chest unic sacrifici
tu âs consacrade la diference cu lis vitimis de leç viere,
acete il sacrifici dai tiei servidôrs fedêi,
santifichilu come che tu âs santificât i regâi di Abêl
e ce che ognidun al ufrîs a la tô maiestât,
che al zovi pe salvece di ducj.
Par Crist nestri Signôr.

Antifone a la comunion Sal 110,4-5

Al à lassade memorie dai siei spetacui:
al à dûl il Signôr e al è bon di cûr,
ur à dade la bocjade a di chei che lu rispjetin.

Daspò de comunion

Signôr, ti preìn, cjale di bon voli il to popul
e, daspò di vêlu inscuelât cui misteris dal cîl,
dai di passâ de viere a la gnove vite.
Par Crist nestri Signôr.